編號 1號

【 蹛佇山頂的囡仔時陣 】 洪宿芬1

阮阿公阿媽蹛佇山頂,遐的山路彎彎曲曲,路邊有足濟種的樹仔,大部份是果子樹,親像梨仔、桃仔、李仔、梅仔恰柑仔,嘛有山櫻花、油桐樹。一年四季行佇山路看著的, 攏是真媠真媠的景緻。

細漢的時陣,阿爸阿母透早就去上班,我佮阿兄猶未讀幼稚園,就留 佇厝裡予阿公阿媽顧。阮阿公作山種梨仔,日時佇園裡沃水、落肥、刜草、 剪枝、接花......,三不五時閣愛濺藥仔。逐工逐工攏有足濟穑頭愛做,流 汗流滴才有果子通收成。園裡較危險,所以阮兄妹仔日時攏綴佇阿媽身軀 邊。阿媽有一塊菜園仔,種一寡菜通家己食。逐擺阮綴去菜園仔,就逐蝶 仔、掠蟲、褪赤跤浞漉糊仔糜,耍甲規身軀垃圾哩囉。阿媽若沃菜沃好, 越頭看著阮兄妹仔,攏會驚一越,隨喝聲講:「哎哟!恁兩个哪會遮勢醬?」 維落來水管牽過來,就對阮的跤沖落去,阮攏嘛笑甲跳跳,一直喝:「阿 媽!足涼的!我的手嘛欲沖予涼涼涼!」

毋過阿媽可能感覺阮傷過賤,所以閣來就真少焉阮去菜園仔矣!毋過 佇厝裡阮嘛袂無聊,兩个人坐佇冊房的塗跤扮公伙仔。有時是阿兄叫我做 狗仔,我就用爬的,假影是一隻細細隻的狗仔囝,寬寬仔爬去伊的跤邊司 奶;有時換伊假做我的貓咪,我若叫伊:「貓咪來,貓咪來!」阿兄會真古 錐一直喓喓叫,爬來我的身軀邊共我舐指頭仔,有夠擽的,阮兩个定定耍 甲毋知通歇睏。 尾仔阿兄佮阿爸阿母搬厝去街市讀幼稚園, 賭我家已蹛佇阿公阿媽兜。 佇山頂無伴的日子, 我上佮意阿公有閒的時陣, 會駛搬運機, 載我佮阿媽, 沓沓仔行山路出去到大路邊。遐有一間箃仔店, 店內阿婆對我誠好, 逐擺 攏會提糖仔予我食, 所以我誠愛去遐。

這馬我嘛離開山頂來到街市讀冊,想起彼段蹛佇山頂的日子,我猶是 足數念的。逐工都想欲閣轉去共阿公阿媽司奶,想欲自由自在佇菜園仔拋 拋走.....。

啊! 蹛佇山頂的日子實在是我上甘甜的記持!

¹洪宿芬(Âng Siù-hun)

編號 2 號

【阿母的祕密】 黄文俊

我讀國小三年仔彼冬, 阮規家伙仔搬去臺北拍拚。頭先, 阿爸捌做過塗水, 騙捌賣涼水, 日子猶原攏袂得過。落尾, 阮爸母排擔仔賣臭豆腐佮雞絲麵。做油湯的穡頭濟、大細漢攏愛鬥跤手, 毋過錢水加真活, 比佇庄跤較好過日。

讀五年的歇熱,有一暗我半暝蹈起來放尿,聽著阿母咧共阿爸嚷:「咱 規家伙仔拍拚遮久,誠無簡單生理較穩定矣,想欲儉錢佇臺北買厝,你煞 大主大意欲借錢予人,這擺我袂當順你的意啦!」

隔轉工早起,阿母神祕神祕共我叫去房間內,對衫仔櫥內底共貯錢的銅管仔提出來,內面有一疊一百箍的銀票,叫我陪伊去郵局開戶。因為阿母毋捌字,欲叫我替伊寫資料。後來,我才知影是賣糋粿的坤炎伯欲共阿爸借錢,阿爸無佮阿母參詳就答應矣。阿母驚阿爸做人愛面子、不時借錢予人,決定偷偷仔開一个口座共錢儉起來。伊講阿爸若無看著錢,就較袂弄拐仔花。

口座辦好勢,我真好玄共阿母手內的寄金簿仔搶來相規晡久。彼是我這世人頭一擺摸著寄金簿仔,嘛是阮兜儉錢的第一步。自彼時,阿母收擔、算數的時攏會藏寡私奇,一站仔就會叫我陪伊去郵局。沓沓仔,阮兄妹仔逐个攏捌輪流陪阿母去寄錢,規家伙仔干焦賰阿爸毋知這个祕密!

佇我升國中彼年,夜市仔有坦退人欲共阿爸敲油。 阮阿爸無答應,個

就欹空來厝裡欲揤欲拍。後來,阮煩惱臺北無法度閣蹛落去矣,透暝共包 袱仔款款咧就坐夜幫車轉去庄跤娛。

轉去庄跤了後,阿母決定欲買地來起厝。彼暝,阮規家伙仔做伙參詳,阿爸講:「佇臺北四、五冬,生理雖然袂穩,煞無賭偌濟錢,拍袂直啦!」落尾,阿母提出彼本寄金簿仔,阿爸看阮逐个攏微微仔笑,才發覺伊家已是上晏知影這个祕密的人。

阿母共口座內底佮阮幾个阿兄出社會趁的錢戗做伙,用來買地、起厝。雖 然無啥夠,個就共會仔錢標來相添,阮這口灶總算有一間家已的厝,這攏 愛感謝阿母彼本祕密的寄金簿仔。

編號 3 號

【 濁水彼條溪 】 陳美虹

記持中的濁水溪是一條闊莽莽的溪,溪水自以早到今攏濁濁濁。

細漢的時,透早天拍殕光,阿爸著愛去溪底作穑。因為厝裡無人通共 阮照顧,伊就會共竹籃仔掛佇扁擔的雙頭,我佮二姐兩个人一人一頭,坐 踮竹籃仔內,歡歡喜喜佮阿爸去田裡作穑。

沿路阿爸那行喙裡那哼「農村曲」,這是我記持中上早學的歌曲,逐工聽阿爸唱,聽久自然就會曉。

因為田佇溪的另外一爿,彼个時陣若是欲過溪,閣無想欲蹽水過去,干焦有一條竹管仔橋會當週對岸。阿爸的體格誠好,對厝裡沿路行攏無歇

過溪了後,遠遠就看著阿母已經佇田裡咧薅草矣!阿爸共阮擔到弓蕉園,就共二姊講:「共小妹仔顧予好。外口日頭大,恁踮弓蕉園內底耍就

好,毋通走傷遠哦!」我恰二姊就佇弓蕉跤開始扮公伙仔。共弓蕉葉仔當做盤仔,挖塗準做飯,閣挽一寡仔草仔當做菜。我閣共二姊講愛加攢兩份通有孝阿爸佮阿母。二姊講:「咱是咧扮公伙仔,這也袂使食啊!」二姊這句話予我心內真艱苦,我煞開始流目屎,二姊趕緊共我安慰,叫我莫哭矣!毋過我就是一直恬恬仔咧流目屎,二姊無我法,只好悉我去別位迫退。

細漢的時,真濟歡喜、趣味的記持, 攏是佇濁水溪邊的田裡度過的。 濁水溪啊濁水溪, 請你毋通共我遮媠的記持流去喔!

編號 4 號

【做囡仔時代】 田美瑜

細漢的時陣,讀冊去學校用步輦差不多愛點外鐘。毋過,因為阿爸佇電力公司食頭路,拜一的時陣,會使順紲坐交通車。有一項毋好的所在就是愛較早起來。有一擺我青磅白磅從去坐車,阿母煞對後壁逐過來,共冊包對頭前傳過來,逐家攏知我干焦趕欲坐車,煞袂記得愛揹冊包,這馬想起來實在真見笑。

以早一年仔的學生傷濟,上課愛分早起抑是下晡。有一擺是中畫才去 讀冊,同學佮我行到位的時陣,感覺時間猶閣冗剩,就去溪仔邊掠魚耍水。 等時間袂赴矣,才緊對小路從去。無拄好,拄咧修路,小路煞變做兩枝長 長的竹篙,行佇咧竹篙面頂,若準跋落去下跤,後果是不堪設想。我規个 人愣佇遐,真正是叫天天袂應,叫地地不靈。我那行那掣,到今這个記持 猶深深刻佇我的頭殼內底。

讀五、六年仔的時,就真正是無閒 tshih-tshih。早起時仔去到學校,全班佇教室咧溫習的時陣,老師攏愛叫我寫一寡仔題目踮烏枋予同學練習。有時陣是國語,嘛會使是數學,老師講據在我欲寫啥物攏會使。不而過,我嘛有變無步的時。欲寫欲出的題目攏寫了矣,始不而將,家已出題目。有一擺出數學煞一時失覺察,重耽去,按怎算都算袂出來,實在有夠落氣。

下課的時,別人是走去坦坦,阮是愛去合作社鬥賣糖仔餅。因為福利社的小姐,一个人干焦兩肢手,跤手無夠應付規大陣的囡仔。頭一擺予挨

挨颗颗,吵甲天篷強欲掀起來的囡仔疕驚死。個手伸甲直直直,待佇一格 一格的鐵窗仔頭前,一號、八號、十二號,嚨喉喝甲梢聲,就是為著會使 食著糖仔餅。

逐家咧運動埕参加升旗典禮的時陣,我佮一个一粒一的 má-tsih 是旗手,愛配合音樂,沓沓仔共旗仔升起去面頂。

中畫食飯的時,我恰má-tsih 愛去放送音樂。彼當陣猶是烏色的曲盤。 講誠實的,有的曲盤,阮嘛毋知好聽抑是歹聽,歌聲放落去就著矣!無好 聽才閣換另外一塊。

我的囡仔時代,遐爾仔心適閣趣味,到今,猶是會深深的數念!

臺中市110年度語文競賽初賽閩南語朗讀國小學生組 編號 5 號

【老牛欲出嫁】 張照權

這一日,雲林縣元長鄉鹿南村規庄頭鬧熱滾滾,因為是老牛欲出嫁的好日子。

天拄拍殕光,規庄大細攏總起床矣,欲替老牛辦一場奢颺的婚禮。查 埔人共大門搭做五彩的圓拱門,查某人挲紅圓、做紅龜粿、鼠麴粿,閣準 備一牛車的嫁粧,有幼麵麵的牧草,清甜的紅菜頭佮番薯簽,向望嫁過去 就會當平安順序。

老牛的主人存叔仔行三十外年前,對彰化北斗買著這隻牛,共伊號做「老牛」。存叔仔足疼惜老牛,特別搭一間牛牢予伊蹛。熱天定定噴水替老牛沖身軀,驚蠓仔共叮,閣共晾蠓罩,伊一直將老牛當做是親人咧看待。

穑頭當無閒的時,老牛綴存叔仔起冬落冬,犁田、拖車、駛石碖、挨 塗礱,伊攏是恬恬仔骨力咧做,無半句怨言。看著稻仔好收成,老牛替存 叔仔歡喜。若拄著做大水抑是洘旱,老牛嘛親像有淡薄仔毋甘,予人足感 心的。

日子一工一工過,存叔仔已經八十一歲,袂得通閣牽老牛去田裡作穑矣。有牛販仔出八萬箍欲共老牛牽去创,聽著人欲來買老牛,存叔仔煩惱甲袂食袂睏得。伊想講:「老牛綴我一世人,閣較濟錢嘛免數想,我袂使予老牛變做牛肉乾。」

存叔仔就四界去探聽,看有老牛安養的所在無?天公疼戆人,有雲林

縣政府農業處的鬥走從,西螺農工學校嘛答應欲照顧老牛到老,予存叔仔 較放心淡薄仔。

這一日,西螺農工派一台大禮車欲來娶老牛,存叔仔一面替老牛灇身 軀,一面吩咐老牛:「無你做伴,我會孤單。毋過你做你去免煩惱,新厝 比遮較四序,有囡仔佮你做伴,共你照顧,閣有闊莽莽的草埔仔通予你行 踏,我嘛會定定去看你.....。」存叔仔那交代那流目屎。老牛嘛親像了解 主人的心意,目眶紅紅掠存叔仔金金看。

逐家當咧共老牛送上禮車的時陣,老牛跤步煞停落來,雄雄放一垺「人情屎」,留予存叔仔做紀念,現場的人攏足感動。人牛情深,這是一場珍貴閣感動的婚禮。

編號 6 號

【愛會記得無我轉來喔】 鍾育紋

有一个下畫,阮大伯來招我去看個兜的豬仔囝,我講豬牢臭臭,無愛去。伊煞一直共我唌,講豬牢今仔清過,袂臭啦!拄出世的豬仔囝偌古錐拄偌古錐咧,閣講我會使佇邊仔看個軟奶,提 hòo-sù 管共個灇身軀,嘛會當予我抱起來摸個的毛,猶閣會使看豬仔囝軁過豬牢邊仔的細个空,走去後埕彼搭迢辺......。聽伊講甲喙角全泡,我彼當陣干焦讀國校仔一二年仔,一漢仔疕哪會堪得予人按呢唌?不而過,補習班的車連鞭就欲來載我去上課矣!雖然毋情願嘛是愛另工才去。

隔雨工,有一个房頭仔內的阿伯來阮兜食茶,講伊小等咧欲去阮大伯 遐,彼工的宿題拄好寫好矣,阿爸恰阿母答應予我綴伊去。我就佮彼个阿 伯講好勢,叫伊著愛會記得共我載轉來才會使喔!我歡喜甲喙笑目笑,啊! 豬仔囝,我來矣!

叔伯阿兄看我去到個兜,就隨共我牽咧,親像導遊仝款, 無我去踅個兜的豬牢。彼幾隻仔豬仔囝就若像大伯講的, 古錐甲予我佇豬牢看規點鐘久都袂瘩。尾仔轉去大伯個廳裡的時, 大人做個咧開講, 我佇邊仔煞一直咧哈唏。大人講:「囡仔人下畫無睏擋袂牢啦!小睏一下無要緊。」我真正傷過愛睏, 嘛想講阿伯若欲轉去,就會共我叫精神, 無一睏仔, 我就睏甲毋知人矣。啥人知影我一下醒, 阿伯煞先轉去矣。我氣甲那吼那罵:「講話無準算!清彩騙囡仔!」

大姆共我安慰講:「無啦!阿伯有先敲電話予恁老爸啦!叫伊送貨的時陣才斡過來載你轉去。」毋過我起毛猶是真穩,共伊當做是白賊七仔,就按呢,決定以後無愛閣俗伊講話矣!

無幾日仔,阿伯又閣來阮兜食茶,聽逐个講彼工我哭甲真恭,就好禮仔共我會失禮。只不過彼陣我猶細漢,腹腸無遐爾闊,毋管阮序大人按怎苦勸,自彼站開始,我就無愛閣佮伊相借問矣!一直到我讀國中蹛學寮的時,規禮拜才有法度轉去厝裡一擺,閬足久才閣看著伊,我毋才開始閣再叫伊一聲「阿伯」!

編號 7號

【公園】 游勝榮

這站仔, 阮兜附近的榮星公園實在是有夠鬧熱的啦!因為舊矸仔貯新酒、舊店仔賣新貨!市政府佇舊年尾, 共耍甲強強欲臭殕去的兒童遊樂區, 攏重整理過, 真緊就隨閣開放予逐家迫退矣!

新的設施,毋但有規大片的塑膠地毯、一大窟的幼沙仔,閣有增加誠濟好耍的物件,親像講上蓋新型的趨流籠、空中行吊索、吊雙環啦.....,有幾若項,攏是囡仔人上佮意耍的。

若是拄著歇睏日仔,彼誠實會驚倒人,會使講是人山人海、洘秫秫,有當時仔連欲待都強欲揣無位。有一半个仔閣較古錐,規氣共『thiàn-tooh』順紲紮來,中畫閣叫人共便當送到位。就按呢,大細漢囡仔食畫、睏畫攏佇遮做一擺解決,真正是一兼二顧,實在是有夠心適的啦!毋但大人滿意,囡仔閣較免講,來遮耍一擺就牢咧,定定嘛看囡仔走咧予大人逐。大人喝規晡,囡仔都欲若毋咧,叫攏叫袂振動。若無,就是佇遐張、佇遐躽,佇遐吼毋轉去。這嘛莫怪,個定定攏予人關佇厝裡,若馬出來耍,當然嘛像鳥仔放出籠,四界硞硞從。

會記得做囡仔的時陣,和厝邊隔壁的囡仔伴耍的,若毋是拍干樂、擉

珠仔、搧尪仔標,就是灌杜猴、欲蝶仔、釣四跤仔,有的無的,要法是加偌趣味咧,哪有像這馬的都市囡仔,會當耍的極加嘛是遮的遊樂設施爾,看著一點仔趣味都無。是講囡仔有通耍就好,一時風駛一時船,時代咧變、囡仔的耍法咧變,咱的想法嘛愛綴咧變,若無,是會予人笑咱是老古板呢!毋管時代按怎變,囡仔全款攏是爸母的糖霜丸,看市政府重整理榮星公園予囡仔耍、看大人閣願意陪囡仔出來耍,看甲我這个退休的阿伯仔嘛綴咧變少年,綴個咧「老人食麻油」——鬧熱啦!

編號 8 號

【香菇頭】 曾菁怡

自細漢,我就有一个外號號做「香菇頭」,這恰我頭毛的造型有關係。 因為我烏戡戡的頭毛對目眉面頂到後擴攏鉸甲齊齊齊,就親像是一塊碗公 倒匼佇我的頭殼頂,拄好佇我彼對媠媠的耳仔頂懸。耳仔後的頭毛閣用頭 毛攄仔攄甲短短,敢若拄予割草機割過的草埔,猶閣有留一片青翠。

挂開始,是阿母感覺囡仔人鉸按呢真古錐,久來,這煞成做我的招牌 造型,香菇頭的外號就開始共我綴牢牢囉!

欲維持這个造型真無簡單,因為個外月就愛去頭毛店予設計師修剪一擺,若無是會規个走精去。阿爸攏講開佇我這粒頭的錢實在濟甲算袂清, 平平是查埔的,伊就毋免遮爾仔麻煩。我聽了一直幌頭,今禿頭是欲鉸啥 物造型啦?

遮爾有特色的頭毛型袂輸是我的 khẩng_páng 咧,行到佗位逐家都知 影我這个香菇頭。欲去巷仔尾的麵擔仔食麵,我猶未行倚去,頭家娘就隨 喝講:「香菇頭,今仔日嘛是食焦麵摻滷卵諾?」

「規欉好好——無錯。」我大聲應,有影是免出喙就有通好點菜。

去到圖書館借冊,服務台的阿姨講:「香菇頭,這本冊你毋是借過三擺矣?」阿娘喂,參這都記甲遮爾清楚!猶閣有,一擺放學了後,我耍甲袂記得共冊揹仔囥佇佗位,驚予阿母揲,我佇外口賴賴趖毋敢轉去。等到天欲暗矣,始不而將只好皮繃較絚咧,一路上想幾若套共阿母會失禮的台

詞。想袂到一下轉到厝,竟然看著我的冊揹仔就固佇食飯桌頂懸。阿母講是一个穿內神仔、禿額的阿伯送轉來的,伊干焦共人問講:「有人知影一个鉸香菇頭的囡仔蹛佇佗位無?」人就隨共報甲到。好得佳哉,我無做歹代誌,若無連鞭就傳到厝邊頭尾遮來囉!

香菇頭這个khắng-páng一直陪伴我到國小畢業,彼段日子是我人生上無煩無惱、上快樂的時陣,得著真濟人對我的疼痛佮照顧,實在是幸福無地比。這馬,我已經大漢矣,但是彼種溫暖的記持猶原佇我的心肝內,提醒我愛共這份愛傳落去。